

Aku Yang Selalu Berpergian

Mula mula aku mencari mu dilangit

Dicelah celah awan yang ditiup angin petang

Aku mencari mu tatkala matahari memancar diujung malam di tepi pagi

Aku mencari mu di dalam sinaran pancaran matahari mencecah awan

Aku mencari mu didalam hujan di dalam tiap tiap titis hujan

Aku mencari mu di embun pagi di hujung daun dan rumput

Aku mencari mu di dalam lautan biru dan bertanya pada ikan ikan

Aku mencari mu di kota kota moden

Di liku liku lorong lorong London Paris Amsterdam

Aku mencari mu di Istanbul, di Konya di Lefke

Aku mencari mu di Kuala Lumpur, di Johor Baharu dan di Kota Singa

Aku mencari di alam pejam mata dan celik mata

Aku mencari mu di dalam tidur dan di dalam mimpi

Aku mencari mu di wajah wajah gadis cantik

Lalu ku mencari mu didalam alunan nada dan irama

Didalam baris baris puisi penyair mabuk huruf

Aku mencari mu di stadium bolasepak penonton kagum bersorak

Aku mencari mu di *shopping mall*, di *Macdonalds*

Aku mencari mu di Facebook

Lalu Aku mencari mu di ruang ruang kosong belakang tiang tiang masjid

Diatas rehal didalam mukasurat kertas kuning Al Quran lama

Aku mencari mu didalam baris baris ayat Al Fateha, Yasin dan Ayatul Kursyi

Dan aku mencari mu didalam potong potong baris hadis

Aku mencari mu di maqam maqam wali

Aku mencari mu di Medina dan di Mekah

Aku mencari mu di Hajar Aswad dan Makam Ismail

Aku mencari mu tatkala melontar di Jamrah

Aku mencari mu di dalam tawaf takdim dan khudum

Aku mencari mu di dalam sayup sayup laungan azan

Aku mencari mu di dalam malam malam sepi Ramadan

Aku menanti mu di kala Laylayul Qadar berlabuh dipermukaan bumi

Aku mencari mu didalam Syahadah

Aku mencari mu didalam sedaqah dan zakat

Aku mencari mu didalam sujud didalam rukuk didalam tahiyat

Aku mencari mu didalam qunut

Aku mencari mu di kala Subuh Zuhur Asar Maghrib Isyak

Aku mencari mu di dalam Tahajud, Najat dan Tasbih

Aku mencari mu di dalam lilitan sarban

Aku mencari di atas tongkat

Aku mencari mu di dalam jubah

Aku mencari mu di sisi miswak

Aku mencari dalam harum atar

Aku mencari mu didalam nafas zikir

Aku mencari mu didalam degup jantungku yang belum berhenti lagi

Aku mencari didalam asal kejadian jasad ku

Dalam tanah air api dan angin

Rupa rupanya Kau tidak pernah pergi ke mana mana

Rupa rupanya aku yang kian selalu berjauhan

Rupa rupanya Kau selalu ada disini bersama ku.

Maafkan aku kerana sering berpergian

Awali Cinta Dengan Bismillah

Izinkan aku mulakan cinta ini
Dengan Bismillahi Rahmanir Rahim
Agar setiap gerak tutur kata ku
Menjadi doa
Menjadi pahala yang terkumpul
Dan aku agihkan sama rata
Dengan mu di Akhirat kelak
Agar kita masuk syurga yang sama

Aku mulakan cinta ini
Dengan Bismillahi Rahmanir Rahim
Agar setiap ucapan cinta ku pada mu
Menjadi tutur yang ikhlas
Menjadi doa
Yang ditulis malaikat
Menjadi pahala kebaikan terkumpul
Yang nanti bisa aku agihkan sama rata dengan mu
Agar di akhirat kelak
Kita masuk di syurga yang sama

Kawan Kawan Yang Mati Muda

Walaupun mereka telah tiada di sini

Aku tetap rasakan mereka masih ada di sini

Suara, ketawa, raut wajah

Satu persatu aku ingat

Menjadi terus abadi dalam memori

Umur terbeku dalam waktu

Maka mereka senantiasa muda

Seperti gambar profil mereka yang terakhir

Yang tidak akan ditukar ganti

Dan aku jika diberi umur panjang

Akan menjadi mangsa waktu

Lalu menjadi tua

Dan apabila aku kenangkan mereka

Mereka akan terus muda

Oh ! Untungnya orang yang mati muda!

Jahilyyah Generasi Z

Setan akhir zaman

Kini sibuk menjaja kesesatan

Dengan bijak hujah intelektualisma

Fitnah berlidah pintar

Pena lantang berbicara

Seperti iblis

Memujuk Adam

Memetik buah Pohon Khuldi

Agar seperti Adam dan Hawa

Manusia tercampak keluar dari syurga dunia

Apakah syurga dunia?

Ia adalah pandangan Rahmat

Tuhan yang Esa

Dan apabila insan terkeluar dari

Pandangan Rahmat Sang Pencipta

Disitulah manusia tercampak masuk

Kedalam azab duniawi

Apakah azab duniawi?

Ia adalah kealpaan didalam kegelapan

Berputar putar mengejar suara hujah angan angan sendiri yang tak bertepi

Lalu jadilah mereka kaum yang pekak, bisu dan buta

Sumum Bukmum Umyum Fahum La Ya' Kiluun

Bahaya Sang Penulis (Puisi Untuk Pramodeya Ananta Toer)

Apakah bahayanya seorang penulis

Yang mahu terus menulis kata kata

Yang timbul dari ilham

Dari alam yang tidak dilihat

Apakah bahayanya seorang penulis

Yang menulis dengan impian

Menulis dengan keringat

Menulis dengan harapan

Mencari kebahagiaan

Mencari ketenangan

Dan aku bertanya

Apakah bahayanya seorang penulis

Yang tidak punya pensil untuk menulis?

Sang Pemerhati Dari Jendela Kotor Keretapi

Aku berkelana

Dari Jogja ke Kota Bandung

Bangun, tidur, bangun, tidur

Lapan jam detik waktu

Dari stasiun ke stasiun

Lalu aku jadi pemerhati

Melihat gunung hijau

Mengintai desa desa di kaki gunung megah

Rumah rumah kecil

Penghuni duduk di depan halaman rumah

Melihat aku di jendela comot keretapi

Yang sedang melihat mereka

Aku menjadi cemburu

Pada kehidupan mereka

Yang kelihatan seperti cukup

Kerana mereka ada apa yang aku tak ada

Aku menjadi cemburu

Pada anak anak kecil

Yang mendongak ke langit

Meninjau tarian layang layang

Dibuai angin gunung

Dan keretapi pun terus berlari

Seperti mengejar masa yang sememangnya tidak boleh terkejar

Aku melihat para petani

Terbongkok bongkok menanam padi

Sawah adalah pentas berseni mereka

Matahari panasnya memukul mukul kulit sawo

Menjadi lebih matang

Aku mengintai kehidupan mereka

Dari belakang cermin kumuh jendela keretapi

Yang berlari mengejar masa

Yang tidak boleh terkejar

Perahu Ku Melayu

Tabah membelah ombak

Melawan arus di lautan asing

Semangat ku adalah dayung

Niat menjadi teraju

Melayu nama perahu ku

Dendam Pencinta Rimba

Kau memotong rakus pokok pokok sesuka hati mu

Menjual dengan harga borong

Kau terbang rimba dengan alasan

Menaikkan ekonomi

Tapi kami tahu kau penipu

Duit mu berbillion dolar di dalam bank

Di Amerika

Di Singapura

Di Malaysia

Di United Kingdom

Kaum kerabat keluarga mu

Turut kaya dengan hasil kau

Mencuri harta alam

Dan boleh kah kau beli umur mu yang semakin singkat?

Wahai pembalak haram

Bila kau mati nanti

Aku akan tanam sepohon kecil

Diatas kubur mu

Dan aku akan siram pohon itu berhari hari

Biar ia meresap semua segala zat dari dalam tubuh mu

Yang kau perolehi

Dari wang pembalak haram

Aku akan menjaga pohon itu

Aku akan membajanya

Sehingga ia membesar

Sehingga ia menjadi pohon nan rendah

Nanti akan ku biarkan akarnya melilit mayat mu

Dan pada satu petang aku akan datang dengan sebilah kapak kecil

Dan aku akan gantung didahan mu.

Baru nanti kau tahu bagaimana rasa takut pohon pohon yang ditebang